

失 心

在遙遠个記憶中，你个身體肚項裝等別儕人个靈魂，逐擺係看著你个兩隻目珠直視直視，佢就知得該儕人个靈魂又來作躁¹你个身體，毋知麼人教佢愛用掃把搵尿在你个身項來拂啊拂欸，佢知恁樣做係對你當無規矩，毋過係無奈何？做這件事過後會分佢良心上過意毋得……總係會想有別个辦法無？唉！係講佢做得變做一隻細蚊仔，飛入你个身體肚項來，將該毋係你个靈魂換成好个靈魂，希望做得將你身項別人个靈魂來逐走，來恢復你係正常个人。正開頭屋家人發現你變做同平常無共樣，係你有一擺好好恬恬行無在忒去，無轉屋家兩三日，歸家人那位尋上尋下就尋無？盡後背係隔壁莊个阿雄去莊尾个塚埔²掌牛，正看著你在有一門風水个地門堂睡等，面色無幾好看，嘴項還有含等歸嘴个草仔，阿雄遽遽走到兩腳無貼地，轉來話強強講毋出來个同大家講：「佢有在莊尾塚埔風水个地門堂，影著你兜屋家行無在个阿叔婆！」大家聽著心肝頭打一隻結，仰會前幾日還好好个人，單淨兩三日無轉屋，就變做恁得人驚，毋過看起來阿雄毋像係講笑个樣仔！天墀坪³外背个看啊去，日頭還當大隻，對面山个樹仔，風吹過來緊搖毋停，並無像係發夢个款，雖然大家毋相信還係愛接受，跔等阿雄个屎背尾⁴，去到該門風水个地門堂，將你牽轉屋家來，歸家人个心肚就明知發生麼个事，想愛當做麼个事就無發生來詐毋知過忒就算，偏偏你个外孫阿明牯就當愛問，阿明牯左一句、右一句問你講：「阿姐婆！你恁多日去那位寮，仰無愛分佢跔呢？」這央時你毋單淨無應佢，還面一撇轉⁵去無出一聲，大家看著你个反應有各樣，心肝先愁便來，知得你个靈魂還無跔轉來，屋家肚準備好个抹草水，先同你歸身掙一遍。一日、兩日，一禮拜、兩禮拜，一隻月、兩隻月，就恁樣日見日、年視年過忒，你還係無變倒轉來，正經就係同細人仔搞个人公仔共樣，毋記得鬥著電池仔，係一隻無靈魂个空殼人。屋家肚个大大細細看著你這種無靈魂生活當毋盼得，求神拜佛從來無停過，上至天公爺、三界爺，下到媽祖娘、觀世音菩薩，屋脣个土地伯公，全全就拜了拜，望佢兜做得同你个靈魂尋轉來鬥轉去，恢復到原來个樣仔，毋過看起來係無麼个效果，大羅神仙難救無命人。

毋知係麼个時節開始，自佢略略仔知人我印象肚項，你就分屋家人關在豬欄脣頭个細房間，門口還用一隻大鎖頭鎖等，做毋得分你走出來攏人⁶，因為你出來講个話無人聽有，成下還會罵人，好得毋會動手動腳打人，雖然單淨罵人過講大家聽毋識个話定定，有時會三更半夜出去別人个屋家緊喊，會害別人嚇著，故所高不將將你關在該位。豬欄還有畜幾條豬仔，屙屎屙尿過就會當臭，遠遠就會鼻得著，行在脣頭過愛鼻公撚等⁷，係無就會臭到佇毋著，但係你親像係無鼻著，也係鼻慣咁無感覺忍受得來，輒常還會聽著你自家在該位唱歌仔，在這下來講絕對做毋得恁樣做，毋過該央時實在奈毋何。在該

細房間肚有放一隻尿桶，屙尿愛在該位屙，屙屎間肚个壁角有一隻細空仔，愛在該位屙，講也奇怪就係毋會儘採屙，間肚還係淨淨俐俐，間肚還有用幾埕枋仔釘个簡單眠床、掛有眠帳，睡目毋會分蚊仔叨著，眠床頭前有一張細桌仔做得在該食飯，三餐食飯時節屋家肚大人會將飯菜兜在該桌頂放，下餐食飯該時節正去收碗筷。日時頭在間肚个細窗門看過去，大部分你係在該睡目，臨暗仔顛倒會看著你在間肚行來行去，屋家肚个大人會兜一盆水去同你抹圓身⁸，大約怕恁樣形經過十過年，緊直到你轉去天庭頂高尋佛祖報到，逐日个生活就係共樣啦！佢還記得你愛走該前幾日，有去該間房看你，該央時你已經認人毋著，背囊彎到像釣枋樣仔，你个雙手皮皺著像鹹菜醃⁹，緊摸吾頭那緊笑無多講麼个？自從你走忒過後，該隻間房就無人去過，有兜仔等人驚，想講你个身體肚頂个靈魂，會留在間房度來作躁人，故所大家對你个間房還係有兜礙事礙事。到這下來去田肚頂係看著出禾仔，有跌心白串該頭禾仔就會想著你个形象，該就係心肝無在忒了！你就係大家喊你安做阿亮伯婆，也就係吾愛喊你姐婆太个。

屋家肚个大人有提起過，頭擺你出世在莊下个山腳下，你个阿爸同阿姆係耕田人，但係並無自家个田愛摻人耕，僅可換飯食定定，高不將來同排座第二个你，分分莊項个員外做花園女¹⁰，常常會分員外个屋家人來苦毒，像一擺同員外煨藥仔無翻渣，將藥粕倒忒就分人打到半生死，對這種情形你內心非常不滿，總係會想有一日自家想辦法會出頭天，就因為恁樣形壓力變當大，嚙等牙根來過日仔，日仔難過還係愛過下去，一日過仔一日毋多知仔過欵十過年，你也漸漸仔大咗，本來員外个俀仔，也就係少爺係愛分你對个，等到好嫁好討个二十年華，顛倒嘎看毋上眼討過別儕，這对你來講又係一擺个打擊，雖然你也毋係盡合意个少爺，但係最少物質方面還毋會缺乏，還過毋使像頭擺分人苦毒。就在少爺討過別人無三隻月，好好惦惦嘎來遭著¹¹發冷仔，一下燒歸身仔脫光光，一下仔冷蓋三領被還毋罅燒，無幾多日就來死忒，會死个前一暗晷，正同你講這一段話。

佢講：「阿美仔，從細看你到大，來到吾屋家分你食盡當多苦，偲俚青梅竹馬共下大，草木就有情莫講人，講無感情係騙人！」你一面聽佢講並無加講麼个，心肝想到這下來過講也無意義，就目珠个目汁毋聽講流無停。到這下來你除忒噉以外，無講半句話，因爭你个心肝肚有愛同這眼前無緣个人，做生死離別个哀傷，還愛回想在這隻家庭所受个苦境雖然這兜全係過去个事情，毋過還當像係昨晷日正發生个樣仔，永遠毋會添放忒。正來到員外屋家个時節，大約六、七歲，刀嫵還擊毋贏，愛縈草結來起火，番仔火還蹶毋著，洗米煮飯菜項項就愛學，將三餐飯菜愛煮好，等到主人一屋家人全部食飽，正好輪自家食，等到愛食就伸著菜腳仔定定。加兩年八、九歲仔，過年過節愛舂菜打板，閒時愛擊針、擊¹²衫褲，一年三百六十五日，逐日就無閒像極樂仔轉無停，練就一身个好功夫。雖然恁無閒，心肝肚係空虛，同該大陂塘頂个藻仔、闊野野仔旱地个細草、天

空頂个浮雲共樣，完全係無佷無憑。成十歲仔開始屋家肚事仔做忒，田坵肚个粗事，牽牛拖犁、耙、碌礮駛到翻轉來，絕對毋輸該兜細俵長年，蒔田、茅草、割禾、拉屎桶難你毋著，一身晒到烏刻刻仔，完全無像係細妹仔，也好啦！有砸礮个身體，就較毋驚別人來欺負，經過這種茫茫渺渺个心肚牽掛，又像係有在該聽這眼前無緣人講該兜話，毋多知仔過欸一晝邊，正知還當多事無做，回神過後遽遽目汁掉燥，該做个事還係愛進行等來，係無驚怕會分人罵。雖然心肝肚早就有準備，會有這日來到還係會毋盼得，目汁忍毋核還係會跌下來！

這脣頭个無緣人就恁樣走忒，經過這擺家庭成員个變動，員外有想著香火相傳个问题，有一日喊你來到廳下來參詳，這時員外用哀求个聲同你來講：「妹仔子，你雖然毋係自家降个，來到吾屋家也有一兩十年久，為著這隻家庭，無功勞也有苦勞，過去對你有較毋好，實在盡為難你，今這下吾俵仔發病仔來過身忒，有想愛收你為女，還愛同你招婿郎，來傳宗接代，毋知你想仰般正好？」你聽著員外恁樣講，還愛考慮看啊！無講珍等就回應員外，你心肚想去想轉到底愛仰般正好，留下來單淨係做員外个妹仔，這妹仔毋係親骨肉，總係會惜皮毋惜骨，還有愛擔恁大个責任，係自家做得承受得來無？係無留下來看員外，正經過白頭那毛人送烏頭那毛人，悲傷時間還言過忒，實在就忍毋下這隻心。盡後背考慮結果還係留下來，人个心係肉做个，毋係鐵打个。這十過年花園女个生活過來當辛苦，毋過七分自家練就一身个本事，管理這隻有錢个大家庭應該無問題。就來答應員外留下來，也正式轉嘴喊佢「阿爸！」這員外喊歸家人集合在天墀坪，將這變化同內內外外使婢傭人講一遍，知得這件大事過後儕儕就代你歡喜，總算天公伯分你一隻公道，你同大家講將來還愛靠大家搵手合作，重新建立新个生活模式。

下決心開始將阿爸交分你管理个山仔同田，像二崗坪該係旱田同山皮仔，做得種番薯豬菜、番豆這兜燥作，全部分一儕人去負責，有水个像外獅潭該兜洋田，做得蒔田種筍筍請另外一儕人去處理，屋家肚閒時煮三餐、愛拚掃裡背外背、洗衫褲，年節敬神拜阿公婆、刷雞捋鴨打板蠟粽仔，服伺阿爸、阿姆兩個老人家、陪佢兜打嘴鼓等等，全部有專人來打理，逐項事情從頭漸二安排好勢，絕對毋會落差袋¹³，實在分人感覺你係當慶腳。日常生活安頓無問題，你會想愛為著這隻家族个永續經營同發展，一方面對人丁个增加，自家在爺哀同意過後，開始招駙馬爺，恁堵好隔壁莊頭，有一個年紀同你相仿个後生仔安做阿龍，佢生來一表人才，自家有讀兜仔四書五經，雖然毋敢講係當有字墨，但係做人做事个道理全識透透，知進退、有分寸，盡打爽个係屋家肚苦到脣痠肚，算係一個有理想無哪好發揮个青年。故所你就拜託屋家个總管阿盛伯，去搭信分該後生人阿龍仔，邀請佢過來屋家教大家四書五經，順續探厥个性體同意願，肯來加入這隻家族个團隊，經過一年半載大家也有一定程度个認識同了解，阿龍仔對這家族也當有信心，同

你兩儕為著將來發展共同打拚！在該央時這種做法招婿郎當普通，毋過從細妹仔這方積極主動去選，還係盡少見哦！你个見識同膽量比麼儕就還較大，這件好事傳遍附近歸十里。自從招阿龍仔做駙馬爺過後，兩公婆就像秤仔同秤砣，做麼个事就會互相參詳來決定，非常恩愛和接過生活，毋多知仔也有兩男一女來下世，這三個細人仔當等人惜，做阿公阿婆看著這兜孫仔、孫女，暢著奈毋得，想講自家總算有好香火相傳，就算毋係親骨肉毋去計較恁多，日仔就係恁樣一日一日過去。

等到家庭漸漸仔穩定過後，你還想將腳步踏出去，計畫愛去做生理，萬事起頭難愛做麼个生理，恁來恁去頭先想著開豬砧怕會較好賺，在街路項同人購一間店面來，毋過像阿龍仔讀書人，愛去畜豬个人家捉豬無法度、刷豬還較奈毋何？賣豬肉結果係半夜想該千條路，天光本本磨豆腐，就恬恬仔來煞忒去。第二想著係開礮間精米所，這怕毋會難，愛同有耕田个人家糴穀來礮穀、精米，將精好个米糴出去，這定著無問題，萬丈高樓從底起，決定好勢就將精米機器買轉來鬥好來，運轉有成半年樣仔，老公會試著虐削¹⁴合壅塵打灰，礮糠、粗糠永遠分毋清，高不將還新新个精米機器轉賣出去。有兩項生理做毋起來，你乜毋會來死心，失敗為成功之母，國父革命十擺正成功，這擺想換過剃頭本錢較省，頭擺剃頭師父愛出莊，耕田人用一擔穀來換歸家人一年剃頭个工錢，有聽人講過做生理第一好係賣冰，第二好就係做醫生，你會試著剃頭也不差哦！因爭這種生理做得像割韭菜樣仔緊割會緊生，故所長年透天就有人喊愛剃頭，雖然這無賣豬肉好賺，但係勻勻有好剃。

自家有做生理，分人感覺錢銀當利便，就算毋係麼个大頭路，小小生理贏做工。逐日日頭在東片出來，斷烏邊就會下山去，歲月隨等宇宙運轉來增加，日仔過著平安順序，毋知多仔過忒兩三十年，你个歲數也漸漸來到一甲子，人生總係會回想著頭擺，辛苦个時光過忒，感受著幸福个日仔特別遽，這種年紀个人當看得開，你同阿龍仔拚毋過歲月个摧殘，白頭那毛一條一條恬恬仔趕出來，目珠開始花花輒常瓠仔看做菜瓜，牙齒硬个咬毋得落去像甘蔗，手脚硬鉸硬鉸毋靈活。又加上社會轉變，做生理个人緊來緊多，競爭越來越多，傳統做法漸漸毋會分人接受。

有一日阿龍仔同你參詳講个講：「做一生人个頭路，有想愛來寮暍，換後生人去拚唉！」

你就應佢講：「乜好啊！正經毋識去想過愛退休，一生人總係知愛煞猛打拚定定。」

阿龍仔還有講：「想愛規劃老年个生活，仰般來安排會較好？」

你也過應佢：「係啊！有影哦。後生辛苦老來享福係應該啊！」

你兩儕參詳計畫過無幾多日，心肝肚正歡歡喜喜暢啊起來，言知蒼天總係會撩弄人，計畫永遠珍毋著變化，大家萬萬就無想著，一路里來當砸身个阿龍仔，嘎來著著¹⁵ 蝥瘕喀牯¹⁶，大約無半年阿龍仔就轉去見祖公。將阿龍仔送上山頭過後，屋家肚就像缺一隻角，你自家心肝頭無佷無憑，暗晡頭睡目會試著孤栖个，係漂在茫茫大海肚个一條船，朝晨頭翫床過後，眠床刀¹⁷ 項坐等來發琢愕，想講日頭做麼个逐日會出來，又會落山走去園真係分人想毋通，生活就恁樣迷迷痴痴過日仔，恁堵好有一位在深山修行个師父，行在門前過順續來化緣，這師父知得你心肚个空虛，想愛來渡化你湊你共下唸經修課。就怕係恁樣開始有欵出家修行个想法，就算係全家人反對之下，還係決心愛珍師父上山離開你親身建立个家庭，放忒可愛个家人也放棄紅塵个所有一切，大家人就料想毋著，你个心仰會恁纏得著，做得看破世間人个有同無？隨等佛祖个腳步向前行，該佛祖涅槃係最高个境界，就像係一盞明燈照亮這條大路，指引你前進个方向。

自從你離開著這家庭，屋家人像無大樹樣仔搖搖蕩蕩，也係火車密密¹⁸ 跌馬下來，經過有欵大約年零，你个大俠仔漸漸核起責任來當家，這隻屋家還係愛有自家運轉个路，大家平安無事過忒幾下年，堵好大家就會將你添放忒該一站仔，有一日个臨暗仔，突然轉來屋家肚，大家就分你嚇著，所有个傢伙全部搬轉來，看來又怕愛改變過去一向个堅持。正經就係分大家當意外，你同佢兜講：「珍師父去到山頂過後，逐日就會唸經修行，定著愛心肚無掛吊，做毋得有任何个雜念，正會修得成果，你做毋著心肚該隻結解毋開，日日思念屋家肚个大大細細有食飽、有作燒無？」「成下還會偷偷園等來跌目汁，有一擺堵好分師父發現著，師父就勸話你講同佛祖个緣分還言到，塵緣放毋開該隻結永遠打毋開，還係下山去還俗好吔！」毋正會再三考慮轉來屋家同大家共下。大家無過加講麼个話，歡迎你轉來加入原本這隻家庭，過欵十過日後，係你發覺著這屋家已經毋係你離開之前个家庭，大个俠仔為著愛當家，屋家肚愛有舖娘人來搵手牽家內事，洗洗盪盪煮三餐等，故所該兩年就有討舖娘，這舖娘當伶俐，家內事逐項做到好勢，從來毋使別儕來插手同過嘴，但係性體就無盡好。你轉來過後有感覺這心白慶腳，雖然知得這一點毋使你去愁，毋知厥个壞性體完全無好分人參詳，有一暗晡食飽夜身腳洗好，為著洗衫褲這種細事情，兩儕冤家搵著當無歡喜，就差無打起來定定。自這擺過後你會想講這隻屋家，已經毋係你做得繼續戴下去，有時有節總有一日會來離開這隻家，故所三不二時自家一儕無日無夜行上行下，若个俠仔知得這種情形毋敢加講，因爭一片係自家个阿姆，另外一片係自家个舖娘，你自家恁去恁轉只好將計就計，正會來演出分魁神仔牽去塚埔个風水這齣戲碼。

這也實在為難你囉！在你登仙後正有人知得你用心良苦，為著這隻家庭個圓滿，犧牲恁大假做失心，分人看毋出來，看看過去同將來，怕無半儕人做得著同你共樣，你在吾个心肝肚係客家婦女个良範，佢愛細細聲同你講：「姐婆太，佢愛你哦！」

作者註

1. 作躁：zog cau 捉弄。
2. 塚埔：cung` pu` 公墓。
3. 天墀坪：tien` cii` piang` 庭院。
4. 屎背尾：sii boi mi` 背後。
5. 撒轉：ngau zon` 翻過去。
6. 搵人：lug` ngin` 搗蛋。
7. 撚等：ngien` den` 搗住。
8. 抹圓身：mi` ien` siin` 擦澡。
9. 鹹菜醃：ham` coi gie` 梅干菜。
10. 花園女：fa` dun` ng` 小媳婦。
11. 遭著：ce do` 傳染。
12. 攞：lion` 縫。
13. 落差袋：lau` ca` toi 雜亂不堪。
14. 虐削：ngiog` xiog` 其癢無比。
15. 著著：cog do`，傳染到。
16. 壑癥喀牯：音 hai` kie kag ku` 肺結核。
17. 眠床刀：min` cong` do` 床沿。
18. 密密：med med 密集。



作者感言

黃火盛

這係第二擺拿著共隻平等數个獎，雖然無像頭一擺恁歡喜，毋過還係當承蒙評審先生，分俚這隻機會來肯定自家，當然共樣个名次成下乜會來想看啊！自家哪位還愛加強，無足个部分看有麼个辦法，來增加能力有好前進个力量，時時愛提醒恁樣還係毋罇个。

語言傳承做得靠口說个聲音摻文字个記載，口說用錄音係真好个方式，毋過保存有較困難，文字記載顛倒會較容易，頭擺人講个：「口說係風，筆寫係蹤。」故所在有生之年多發表文章，將來留下來會分下代人用得著。

人生像舞臺樣仔，有人做戲有人看戲，盡多人會講：「做戲个係癲仔，看戲个戇仔。」舞臺頂高个表演總有散棚个時節，不管下臺該央時係靚抑係無靚个，做得分看戲个人轉到屋下，還在心肝肚項掛吊等這角色，會有好个收尾，久久毋會散忒，甚至一生人就記得戲臺頂任何一景，係笑係噉係歡喜抑發譴、發闕，全係留分人無限个懷念，做得講這生人就有價值。